

四庫全書

史部

欽定四庫全書

宋名臣言行錄外集卷十一

宋 李幼武 纂集

胡宏 五峯先生

字仁仲文定公之季子自幼志於大道嘗見楊中立於京師又從侯師聖於荆門而卒傳文定之學
晚歲嘗被召旨不幸寢疾不克造朝而卒

先生優游南山之下餘二十年玩心神明不舍晝夜力

行所知親切至到析太極精微之旨窮皇王制作之
原綜事物於一原貫古今於一息指人欲之偏以見
天理之全即形而下者而發無聲無臭之妙使學者
驗端倪之不遠而造高深之無極體用該備可舉而
行先生之於斯道可謂見之明而擴之至矣

張南軒曰知言一書乃其平日之所自著其言約其義
精誠道學之樞要制治之著龜也

或問於南軒曰論語一書未嘗明言性子思中庸獨有

天命之謂性一語而孟子始道性善今先生知言反復論性為甚詳無乃與聖賢之意或有異乎南軒曰無以異也夫子雖未嘗明言性而子貢蓋嘗識之曰夫子之言性與天道不可得而聞也是豈真不可得聞哉蓋夫子之言無非性與天道之流行也至孟子時如楊墨告子之徒異說並興孟子懼學者之惑指示大本使知所止今之異端則又異乎古自謂識心見性其說開廣故高明之士往往樂聞而喜趨之一

溺其間則喪其本心墮弛萬事毫釐之差霄壤之謬其禍可勝言哉先生於此又烏得而忘言也其言有曰誠成天下之性性立天下之有情效天下之動心妙性情之德又曰誠者命之道乎中者性之道乎仁者心之道乎惟仁者為能盡性至命學者能精察於視聽言動之間卓然知夫心之所以為妙則性命之理蓋可默識然後知先生之意與古人若合符節矣不然不知求仁而居然論性則幾何其不流於異端

之歸乎

知言曰天命之謂性性天下之大本也堯舜禹湯文王

仲尼六君子先後相詔必曰心而不曰性何也曰心

也者知天地宰萬物以成性者也

南軒改作而主性情也

六君

子盡心者也故能立天下之大本人至于今賴焉不

然異端並作物從其類而瓜分孰能一之

道充乎身塞乎天地而拘於軀者不見其大存乎飲食

男女之事而溺於流者不知其精諸子百家臆之以

意飾之以辯傳聞襲見蒙心之官命之理性之道置諸茫昧則已矣悲夫此邪說暴行所以盛行而不為其所惑者鮮也然則奈何曰在修吾身

天理人欲同體而異用同行而異情進脩君子宜深別焉

朱子曰天理人欲同體而異用一句說得不是天理人欲如何同得又曰如是即是性可以為善亦可以為惡却是一團人欲窠子將甚麼做體

呂東萊曰知言勝似正蒙朱子曰蓋後出者巧也

朱子曰正蒙規模大知言小

又曰近世為精義之說莫詳於正蒙而五峯亦曰居敬所以精義也此言尤精切簡當深可玩味

謂天命為不囿於物可也以為不囿於善則不知天之所以為天矣謂惡不可以言性可也以為善不足以言性則不知善之所自來矣知言中此等議論與其他好處自相矛盾者甚多却與告子楊子釋氏蘇氏

之言幾無以異昨來所以不免致疑者正為如此惜乎不及供洒掃於五峯之門而面質之耳

知言中議論多病近疏所疑與敬夫伯恭議論如心以

成性相為體用性無善惡心無死生天理人欲同體

異用先識仁體然後敬有所施先志於大然後從事

於小

如本天道變化為世俗酬酢及論游夏問孝之類

此類極多又其辭意

多迫急少寬裕良由務以智力採取全無涵養之功

所以至此然其思索精到處何可及也

知言之書用意精切但其氣象急迫終少和平又數大
節目亦皆差誤如性無善惡心為已發先知後敬之
類皆失聖賢本旨

五峯善思然思過處亦有之

五峯臨終謂處德美曰聖門工夫要處只在个敬此
為名論

五峯有本亭記理固是好然其文章排布是文人之文

並朱
子語

南軒序先生文集曰先生非有意於為文者也其一時
詠歌之所發蓋所以紓寫其性情而其他述作與夫
問答往來之書又皆所以明道義而叅異同非若世
之為文者徒從事於言語之間而已也粵自蚤歲服
膺文定公之教至于沒齒惟其進德之日新故其發
見於辭氣議論之間者亦月異而歲不同雖然以先
生之學而不得大施於時又不幸僅得中壽其見於
文字間者復止於此豈不甚可歎息至其所志之遠

所造之深綱領之大義理之精後之人亦可以推而得焉

南軒見先生先生辭以疾他日見孫正孺而告之孫道五峯之言曰渠家好佛宏見他說甚南軒方悟前此不見之因於是再謁之語甚相契遂授業焉南軒曰杖若非正孺幾乎迷路

胡憲 籍溪先生

字原仲建之崇安人文定公從父兄之子稍長從

文定學始聞程氏之說尋以鄉貢入大學一旦歸
隱故山從臣薦之召授本州添教尋監南嶽廟為
福建帥司准遣奉祠改秘書省正字病求去以左宣
教郎主管崇道觀歸而卒紹興三十二年也享年
七十七

生而沉靜端慤不妄言笑長聞程氏之說入太學會元
祐學有禁乃與鄉人劉致中陰講而竊誦焉又講易
於涪陵處士譙天授久未有得天授曰是固當然蓋

心為物漬故不能有見唯學乃可明耳先生喟然歎
曰所謂學者非克己工夫也耶自是一意下學不求
人知一旦揖諸生歸

先生歸故山力田賣藥以奉其親非其道義一毫不取
於人文定稱其有隱君子之操而鄉人士子慕從之
遊日以益衆一時賢士大夫聞其名者亦皆注心高
仰之

紹興己卯公由司直改正字將就職晦翁送行有詩曰

執我仇仇詎我知謾將行止驗天機猿驚鶴怨因何
事只恐先生袖手歸其後又寄詩曰先生去上芸香

閣閣老新裁旁角冠

時劉珙自秘書丞除察官

留取幽人卧空谷

一川風月要人看

章

甕牖前頭列畫屏晚來相對靜

儀刑浮雲一任閒舒卷萬古青山只麼青

章二

五峯見

之曰其言有體而無用因別賡之曰幽人偏愛青山
好為是青山青不老青山出雲雨太虛洗盡塵埃山
更好似為籍溪解嘲

晦翁致書畧曰前日聞極論天下事至於慷慨洒涕有以見仁人之心不能忘世如此天其或者一試大儒之效乎聞之喜而不寐伏計必有規模素定於胸中某切謂天下形勢當路所不可不知也救之之術獨在救其本根而已不過視天下人望之所屬者舉而用之使其舉措用舍必當於人心則天下之心翕然其氣力易以鼓動如羸病之人針藥所不能及灸其丹田氣海則氣血萃於本根而耳目手足利矣

秦檜用事天地閉塞幾二十年先生亦以泊然無復當
世之念及檜死羣賢稍復進用先生為正字當奏事
殿中而病不能朝即草疏言金人大治汴京宮室勢
必敗盟今元臣宿將惟張浚劉錡在而中外有識皆
謂金果南牧非此兩人莫能當惟陛下急起而用之
臣死不恨矣時二公皆為積毀所傷上意有未釋然
先生獨極意顯言無所避疏入即求去矣

先生質本恬淡而培養深固平居危坐植立時然後言

望之枵然如槁木之枝而即之溫然雖當倉猝不見
其有疾言遽色人或犯之未嘗校也其讀書不務自
為訓說嘗纂論語說數十家復抄取其要附以已說
晦翁祭之文曰惟公之生氣質溫良弱冠而學有志四
方發軔蓬蒿至於臨漳學承於家行著于鄉乃獻王
府乃游膠庠中退而休客彼洛陽有隱其居惟蜀之
莊公乃東脩踵門于堂一語妙契發乎天光浩然東
歸衡泌洋洋我簞我瓢我糲我糠或漁於溪或圃於

岡水鯉鮮腴藥穎豐長以是為養胡考寧康以是為
樂逍遙相羊我心悠悠歲月於荒華髮斑衣名聞帝
旁弓旌鼎來聘幣是將義不去親欲隱彌彰乃命典
教於梓於桑作人之功於今靡忘中秘之官典冊是
藏公晚而居羣儒所望陳謨帝前震聲廟廊人曰先
生允仁且剛旋反舊廬既壽且臧云胡不淑奄忽而
亡

又曰先生教諸生於工課餘暇以片紙書古人懿行或

詩文銘贊之有補於人者粘置壁間俾往來誦之咸
令精熟

劉子翬 病翁先生

字彥冲忠顯公之次子以忠顯勲補承務郎辟真
定幕府忠顯薨執喪過禮服除倅興化軍秩滿以
最聞詔還蒞故官先生始以哀毀致疾自以不堪
吏責遂丐祠主管武夷冲佑觀以歸十有七年四
為崇道祠官累階右承議郎享年四十七紹興十

七年十二月終

少負奇材未冠游太學聲譽出等夷世家屏山下潭溪
之上有園林水石之勝既得祠祿於是俯仰其間盡
棄人間事自號病翁獨居一室危坐或竟日夜嗒然
無一言意有所得則筆之於書或詠歌以自適間數
日輒一走忠顯墓下瞻望徘徊涕泗嗚咽或累日而
後反兄弟之間怡怡如也

忠肅公即先生之猶子也幼開爽嗜學先生愛且奇之

教以文行經業不少懈而必使務其遠者大者與胡
原仲劉致中為道義交相見講學外無一雜言與他
所游亦皆海內名士無不歎服深遠自以為不及而
先生之心未嘗少自足雖間常人有片言之善無不
從容咨叩必竭兩端而後已至族黨後生來問學者
則亦隨其器識告語成就終日無倦色

晦庵一日請問先生平昔入道次第先生欣然告之曰
吾少未聞道官莆田時以疾病始接佛老之徒聞其

所謂清淨寂滅者而心悅之以為道在是矣比歸讀
吾書而有契焉然後知吾道之大其體用之全乃如
此抑吾於易得入道之門焉所謂不遠復者則吾之
三字符也佩服周旋罔敢失墜於是作復齋銘聖傳
論以見吾志汝尚勉哉

先生始得微疾即入謁宗廟泣別母夫人前徧以書告
決素所與往來者召其姪珙付以家事指示墓處中
外孤遺人人為計久遠昏宦舍業之既已則日與學

者論說脩身求道之要作訓誡數百言彈琵琶賦詩澹然如平日居兩日而沒

學尤深於易家有東西二齋東以復名西以蒙名蒙齋之記有曰三代而下易學廢矣六國之士為談說所蒙兩漢之士為章句所蒙晉魏之士為虛無所蒙隋唐之士為詞藻所蒙皆處偏滯而不反如波袞沙反以自渾如谷騰霧反以自暝初不知其豁然者常存也今吾與二三子既知之矣可不兢兢肅肅以養其

聖耶

跋浩然子曰學易者必有門戶復卦易之門戶也入室者當自戶始學易者當自復始是知復之一義為聞道之要言進修之捷徑學者踐之真積力久將有捷裂泮真沛然流出於胸臆間所謂易者是自知之矣撰維民論曰民心無常去就無定自古及今天下之民必有所屬堯舜之民禹維之桀解其維而夏亡商之民文武維之幽厲解其維而周亡自秦漢以來此治

亂興亡循環不已也我宋統御皆以寬厚為治至哉
仁宗之仁也三代而下一人而已笑言承恩咳唾為
澤薰酣沉浸四十餘年所以維民者盡矣

講經制之道曰國富而節人有拂心因窘而節人有恕
心今主計之官無出入之制隨田取足不量民力焉
兵以衛民食於民官以治民食於民苟出不臨戎居
不司事勿食可也郡縣已併旋復員缺可減復增或
慮裁抑之行衆將咨怨殊不思費用之廣浩於丘山

非天降而地溢也一取於民耳此經制之道有未盡也

聖傳論曰吾觀古聖賢進德之速未有如湯者湯之盤銘曰苟日新日日新又日新夫豈有瞬息悠悠意度哉樂善如貪契理如函聞非如獲利舍過如遺蛻德必日新也日新之學非踐履純實不自覺知彼謂聖道一言可契非由階級不假修為以日就月將為初學以真積力久為鈍才是自誣也

先生有復齋蒙齋二琴嗣子珏葆藏之門人朱熹敬為
作銘

復齋曰匪金匪石含玉真兮雷伏於腹閱其神兮磬
然一作萬物皆春含我靚器寶懷若人兮主靜觀復
修厥身兮與時皆訕而不及其伸兮

蒙齋曰抑之幽然者若直其遇險而止寫之冷然者
若導其出山之泉蓋先生之言不可得而聞矣若其
亨貞之意則託茲器而猶傳

又跋文集曰先生文辭之偉固足以驚一世之耳目然其精微之學靜退之風形於文墨有足以發蒙蔽而銷鄙吝之萌者尤覽者所宜盡心也

先生有聞箏詩曰

月高夜鳴箏聲從綺牕來隨風更迢遞縈雲暫徘徊
餘音若可玩繁絃互相催不見鳴箏人遙知心所懷
寧非舊寵棄豈念心期乖含情鬱不發寄曲宣餘哀
一彈飛霜零再撫流光頽每恨聽音稀銀甲生浮埃

幽幽孤鳳吟衆鳥聲難諧盛年嗟不偶况乃容華衰
道同符片諾志異勞事媒棲棲牆東客亦抱凌雲才
晦翁跋曰此詩先生少所作也規模意態全是學文選
樂府諸篇不雜近世雜體故其氣韻高古而音節華
暢時輩少及晚歲筆力老健出入衆作自成一家則
已稍變此體矣嘗謂學詩且當以此等為法庶不失
古人本分體制向後若能成就變化固未易量然變
亦大是難事變而正則縱橫妙用何所不可一失其

正却似反不若守舊法之為穩也

跋先生遺帖曰先生壯歲棄官端居味道一室蕭然無
異禪衲視世之聲色權利人所競逐者漠然若亡見
也熹蚤以童子獲侍左右先生始亦但以舉子見期
某竊窺見其自為與教人者若不相似暇日僭請焉
先生欣然嘉其志乃開示為學門戶朝夕誨誘不倦
其後屬疾某適在外亟歸省問甚喜曰病中無可與
語幸子之歸也自是教詔益詳期許益重至為具道

平生問學次第傾倒亡餘一日授詩一篇乃其手書
歿後發其所封遺書復有片紙屬某末有勉力大業
之語某泣受寶藏不敢失墜以示子孫及同志使知
跋慕前修景行之懿

問原道謂軻之死不得其傳程子以為非見得真實不
能出此語屏山乃以為孤聖道絕後學何如笑曰屏
山只要說釋子道流乃得其傳耳

又問如十論之作於夫子全以死生為言似以此為大

事了久之乃曰他本是釋學但只是翻騰出來說許

多話耳

並朱子語

劉勉之 白水先生

字致中建之崇安人鄉舉詣太學歸過南京見劉忠定楊文靖授業後以中書數臣薦詔詣闕未及召見給札後省謝病歸紹興十九年二月卒年五十九

自幼強學日誦數千言耳目所接一過不復忘為文肆

筆而成滂沛閎闊凌厲頓挫儕輩少能及之

踰冠入太學時蔡京用事方禁士毋得挾元祐書制師
生連坐法犯者罪至流徙名為一道德者而實以鉗
天下之口君心獨知其非是陰訪伊洛程氏之傳得
其書而藏去深夜同舍生皆熟寐乃始探篋解裹下
帷然膏潛抄而默誦之聞譙公天授嘗從程夫子遊
兼邃易學適以事至京師即往叩之盡得其學之本
末既而遂厭科舉之業一日棄錄牒揖諸生歸

見劉元城楊龜山皆請業焉劉公尤奇其才留語數十
日告以平生行已立朝大節以至方外之學他人所
不及聞者無不傾盡先生拜受其言精思力行朝夕
不怠久而若有得焉昔聞一言之善融會貫通皆為
已用而踐履日已莊篤

與籍溪胡原仲屏山劉彥冲兩先生友善日以講論切
磋為事其於當世之務若不屑焉而論說區處鉅細
顯微皆有條理

亂後故山室廬荒頓乃即建陽近郊蕭屯別墅結為草堂讀書其中力耕稼以自給淡若無求於世而一時賢士大夫莫不注心高仰之

中書舍人呂公居仁知公之深嘗以小詩問訊有老大多材十年堅坐之句世傳以為實錄時國家南渡幾十年謀復中原以攄宿憤而未有一定之計方且寤寐俊傑與圖事功呂公乃與同列曾公天游李公似之張公子猷三數人者共列其行誼志業以聞於朝

特詔詣闕將行屏山先生為作招劍之文以祝之其
卒之亂曰寶劍來奉君王撫四夷定八荒時乎時毋
深藏其所望於先生者如此

秦檜專國柄方決和戎之策惡聞天下正論意山林之
士不顧利害敢盡言觸忌諱尤不欲使見天子談當
世事第令策試後省給札俾上其對先生知道不易
行即日謝病歸杜門高卧十餘年造養益熟名聞日
尊故相趙忠簡出鎮南州道出里門紆轡入謁坐語

移日彌加歎重然而去未幾即遭讒竄海外以沒同時知先生者亦皆廢錮不復用先生竟不及一試於用而卒有志之士莫不哀之

先生學本為已而才周世用臨事裁處不動聲氣平居嚴敬自持若不可犯而接物之際恂恂和悅色笑可親其臨財廉一介不妄取少時婦家富而無子謀盡以貲產歸女氏既謝不取又擇其宗屬之賢者舉而畀之使奉先祀

晦庵曰熹之先君子蚤與先生游相好將沒深以後事
為寄且戒其往學焉及棄諸孤先生慨然為經理其
家事而教誨某如子侄既久以其息女歸之親舊羈
貧收恤扶助亦皆曲盡恩意學子造門隨其財品為
說聖賢教學門戶以及前言往行之懿終日娓娓無
倦色自壯至老如一日也

李侗 延平先生文靖公

字愿中南劍之劍浦人父諱渙贈右朝議大夫先

生為季子晚以一子舉進士試吏旁郡更請迎養
遂自建安如鉛山訪外家兄弟於昭武過其門弟
子故人於武夷潭溪之上徜徉而歸會閩帥王山
汪公以書禮車乘來迎先生往見至之日疾作卒
于府治之館舍年七十一隆興元年十月十五日
也

少遊鄉校有聲已而聞郡人羅仲素得河洛之學於龜
山之門遂往學焉羅公清介絕俗雖里人鮮克知之

見先生從游受業或頗非笑先生若不聞從之累年
受春秋中庸論孟之說從容潛玩有會于心盡得其
所傳之奧羅公少然可亟稱許焉於是退而屏居山
里結茅水竹之間謝絕世故餘四十年簞瓢屢空怡
然自適中間郡將學官聞其名而招致之或遣子弟
從游受學州郡士人有以矜式焉

初龜山倡道東南士之遊其門者甚衆然與其潛思力
行任重詣極如羅公益一人而已先生既從之學講

誦之餘危坐終日以驗夫喜怒哀樂未發之前氣象
為如何而求所謂中者若是蓋久之而知天下之大
本其有在乎是也蓋天下之理無不由是而出既得
其本則凡出於此者雖品節萬殊曲折萬變莫不該
攝洞貫以次融釋而各有條理如川流脉絡之不可
亂大而天地之所以高厚微而品彙之所以化育以
至於經訓之微言日用之小物玩之於此無一不得
其衷焉由是操存益固涵養益熟精明純一觸處

洞然泛應曲酌發必中節後學答問窮夜不倦隨人
淺深誘之各不同而要以反身自得而可以入聖賢
之域矣故其言曰學問之道不在多言但默坐澄心
體認天理若真有所見雖一毫私欲之發亦退聽矣
久乃用力於此庶幾漸明講學始有力耳

又曰學者之病在於未有洒然冰釋凍解處縱有力持
守不過苟免顯然悔尤而已若是者恐未足道也又
曰今人之學與古人異如孔門諸子羣居終日交相

切磨又得夫子為之依歸日用之間觀感而化者多矣恐於融釋脫落處非言說所及也不然子貢何以言夫子之言性與天道不可得而聞也耶嘗以黃太史之稱濂溪周夫子胸中洒落如光風霽月云者為善形容有道者氣象嘗諷誦之而顧謂學者曰有此於胸中庶幾遇事廓然而義理少進矣

語中庸曰聖門之傳是書其所以開悟後學無遺策矣然所謂喜怒哀樂未發謂之中者又一篇之指要也

若徒記誦而已則亦奚以為哉必也體之於身實見是理若顏子之歎卓然見其為一物而不違乎心目之間然後擴充而往無所不通則庶乎可以言中庸矣

語春秋曰春秋一事各是發明一例如觀山水徒步而形勢不同不可拘以一法然所以難言者蓋以常人之心推測聖人未到聖人洒然處豈能無失邪其於語孟他經無不貫達苟有疑問答之必極其趣

嘗曰讀書者知其所言莫非吾事而即吾身以求之則
凡聖賢所至而吾所未至者皆可勉而進矣若直以
文字求之悅其詞義以資誦說其不為玩物喪志者
幾希以故未嘗為講解文義然其辨析精微毫釐畢
察嘗語問者曰講學切在深潛縝密然後氣味滋長
蹊徑不差若槩以理一而不察乎其分之殊此學者
所以流於疑似亂真之說而不自知也

先生資稟勁特氣節豪邁而充養完粹無復圭角精純

之氣達於面目色溫言厲神定氣和語嘿動靜端詳
閑泰自然之中若有成法平居恂恂於事若無甚可
否及酬酢事變斷以義理則有截然不可犯者早歲
聞道即棄場屋超然遠引若無意於當世然憂時論
事感激動人其語治道必以明天理正人心崇節義
厲廉恥為先本末備具可舉而行非特空言而已異
端之學無所入於其心然一聞其說則知其詖淫邪
遁之所以然者蓋辨之於錙銖眇忽之間而儒釋之

邪正分矣

先生之道德純備學術通明求之當世殆絕倫比然不求知於世而亦未嘗輕以語人故上之人既莫之知而學者亦莫之識是以進不獲施之於人退未及傳之於後而先生方且玩其所安樂者於猷畝之中悠然不知老之將至蓋所謂依乎中庸邈世不見知而不悔者先生庶幾焉

韋齋朱松謂先生如冰壺秋月瑩徹無瑕

朱晦庵祭之曰猗歟先生早自得師身世兩忘唯道是
資精義造約窮深極微凍解冰釋發於天機乾端坤
倪鬼祕神彰風霆之變日月之光爰暨山川草木昆
蟲人倫之至王道之中一以貫之其外無餘縷析毫
差其分則殊體用混員隱顯昭融萬變並酬浮雲太
空仁孝友弟洒落誠明清通和樂展也大成婆娑丘
林世莫我知優哉游哉卒歲以嬉云嗚呼先生而
止於斯命之不融誰實尸之合散屈伸消息滿虛廓

然大公與化為徒古今一息曷計短長物我一身孰
為窮通嗟惟聖學不絕如綫先生得之既厚以全進
未獲施退未及傳殉身以歿孰云非天熹也小生總
角趨拜恭惟先君實共源派閭閻侃侃歛衽推先冰
壺秋月謂公則然施及後人敢渝斯志從游十年誘
掖諄至春山朝榮秋堂夜空即事即理無幽不窮相
期日深見勵彌切蹇步方休鞭繩已掣安車暑行過
我衡門返旆相遭涼秋已分熹於此時適有命召問

所宜言反覆教詔最後有言吾子勉之凡茲衆理子
所自知奉以周旋幸不失墜歸裝朝嚴計音夕至失
聲長號淚落懸泉何意斯言而決終天云

云

問先生言行晦庵曰他却不曾著書充養得極好凡為
學不過是恁地涵養將去初無異義只是先生睥面
盎背自然不可及延平初亦是豪邁底人到後來也
得琢磨之力

問先生靜坐之說聞先生頗不以為然如何曰此亦難

說靜坐理會道理自不妨只是討要靜坐則不可若
理會得道理明透自然是靜常見先生說舊見羅先
生說春秋頗覺不甚好不知到羅浮極靜後又理會
得如何某心嘗疑之以今觀之是如此蓋心下熱鬧
如何看得道理出

問延平謂常存此心勿為事物所勝曰先生涵養得自
是別真所謂不為事物所勝者古人云終日無疾言
遽色他真个是如此

曰先生嘗云人之念慮若是於顯然過惡萌動此却易見易除却怕於匹似閑底事爆起來纏繞思念將去不能除此尤害事熹向來亦是如此

先生意只是要得學者靜中有个主宰存養處

問延平行狀云終日危坐以驗夫喜怒哀樂之前氣象為如何而求其所謂中者與伊川之說若不相似曰這處是舊日下得語太重今以伊川之語格之則其下工夫處亦是有些子偏只是被李先生靜得極了

便自見得是有个覺處

問延平欲於未發之前觀其氣象此與楊氏體驗於未發之前者異同如何曰這個亦有些病那體驗字是有个思思了便是已發若觀時恁著意看便也是已發問此體驗是著意觀久恁平常否曰此是以不觀觀之又曰延平說人心中大段惡念却易制伏最是那不大段計利害乍往乍來底念慮相續不斷難為驅除今看得來是如此

李先生取人大抵令於靜中體認大本未發時氣象分明即處事應物自然中節此乃龜山門下相傳指訣大抵思索義理到紛亂窒塞處湏是一切掃去放教胸中空蕩蕩地了却舉起一看便自覺得有下落處此說向見李先生曾說來今日方真實驗得如此

若着些利害便不免開口告人却與不學之人何異向見李先生說若大段排遣不去只思古人所遭患難有大不可堪者持以自比則亦可以少安矣始者甚

卑其說以為何至如此後來臨事却覺有得力處不可忽也

舊見李先生說少從師友幸有所聞中間無講習之功幾成廢墜然賴天之靈此个道理時常在心目間未嘗敢忘此可見其持守之功矣然則所見安得而不精所養安得而不熟耶

並朱子語

朱松 韋齋先生

字喬年徽之婺源人政和八年同上舍出身授建

州政和尉丁外艱服除調南劍州尤溪尉監泉州
石井鎮紹興四年召試館職除正字丁內艱服闋
召對改左宣教郎秘書省校書郎遷著作佐郎尚
書度支員外郎兼史館校勘歷司勳吏部兩曹兼
史職如故修括宗實錄書成轉奉議郎以年勞轉
承議出知饒州未上請間得主管台州崇道觀滿
秩再請命下而卒紹興十三年三月二十四日也
贈官通議大夫

公生有俊才自為兒童時出語已驚人少長游學校為
舉子文即清新洒落無當時卑弱陳腐氣及去場屋
始放意為詩文其詩初亦不事雕飾而天然秀發格
力閑暇超然有出塵之態遠近傳誦至聞京師一時
前輩以詩鳴者往往未識其面而已交口譽之其文
汪洋放肆不見涯涘如川之方至而奔騰颺沓渾浩
流轉頃刻萬變不可名狀人少能及

一日發憤折節並取六經諸史百氏之書伏而讀之以

求天下國家興亡理亂之變與夫一時所以應時合
變先後本末之序期於有以發為議論措之事業如
賈長沙陸宣公之為者閭閻山楊氏所傳河洛之學
於是益自刻厲痛刮浮華以趨本實日誦大學中庸
之書以用力於致知誠意之地

自謂辨急害道因取古人佩韋之義以名其齋蚤夜其
間以示警飭由是向之所得於觀考者益有以自信
而守之愈堅故嘗曰士之所志其分在義利之間兩

端而已然其發甚微而其流甚遠

又謂父子主恩君臣主義是為天下之大成無所逃於天地之間如人食息呼吸於元氣之中一息之不屬理必至於斃是以自昔聖賢立法垂訓所以維持防範於其間者未嘗一日而少忘

御史胡世將撫諭東南公謂而說之曰今日廟堂之議未知其但欲襟憑江漢控引荆吳以保東南而已乎抑當克復神州汛掃陵闕據中原而撫三河也嘗聞

不取關中中原不可復不取荆淮東南不可保今既
進不能以六師之重通道荆襄循漢沔以赴興元結
連跣蹠控引五路東向以圖中原退又不能移蹠建
康治兵訓武北爭荆淮以為固守之計而但感處一
方費日月於道途未知漂漂者竟何如耶

嘗病士溺於俗學而不明君臣之大義是以處成敗之
間者常有苟生自恕之心而關於舍生取義之節將
使三綱淪墜而有國家者無所恃以為安又言宜鑒

既往之失深以明人倫勵名節為先務而又博求魁
磊骨鯁沈正不回之士寘之朝廷使之平居無事正
色立朝則姦萌逆節銷伏於冥冥之中一朝有急則
奮不顧身以抗大難亦足以禦危辱凌暴之侮則庶
幾神器尊安而基祚強固矣

金使議和公與史院同舍胡公瑄等共疏言曰金方吞
噬未厭而一旦幡然與我和者為和之說以侮我耳
又慮我蓄銳待時為和之說以撓我耳金之和使即

秦之衡人六國不悟衡人割地之無饜以亡其國今
國家不悟金使請和之得策其禍亦豈可勝言哉而
執事者方以為吾為梓宮母后淵聖天屬之故昔項
羽置太公俎上而約高祖以降矣唯高祖不信其詐
謀而不為之屈日夜思所以圖楚者卒能感羽於鴻
溝之上使其力屈而太公自歸此可以觀其計之得
失矣

公念國步日艱人心未服而天子無自將之兵諸道無

典戎幹方之實二三大將人擁重兵強不可令事蓋
有不可知者則又數數建言宜復武舉責實用必其
洞曉韜鈴長於綏御者以儲將帥之才下州郡選驍
勇悉送行在以補周衛之缺精擇帥守使蒐卒乘以
壯藩維之勢皆久長之至計反復倦倦不能自己其
於請建太學明人倫以倡節義之風而厲苟媮之習
則又平日之所深慮而每言之所謂如人食息呼吸
於元氣之中一息之不屬理必至於斃焉者非若後

來諸人承望風旨但以課試文墨為粉飾太平之具而已也然而國是已定言無所入由是公之求去愈力而檜之怒公愈甚遂使言者論公獨以懷異自賢陽為辭遜為罪而出之

屏居建溪之上日以討尋舊學為事手抄口誦不懈益虔蓋玩心於義理之微而放意於塵垢之外有以自得淡如也

公性孝友與人交重然諾不以生死窮達二其心接引

後進教誘不怠聞人之善推獎如不及至於邪佞猥
瑣簡賢附勢之流與已異趣則鄙而遠之或不忍正
視其面施於吏治亦皆果決明辨抑邪與正無所顧
避晚既屬疾自知必不起而處之泰然畧無憂懼色
手書告訣所善胡公憲劉公勉之劉公子翬屬以其
子而顧謂熹往受學焉其志道服膺死而後已垂裕
後人不使迷於所鄉者又如此云

宋名臣言行錄外集卷十一

欽定四庫全書

宋名臣言行錄外集卷十二

宋 李幼武 纂集

朱熹 晦菴先生徽國文公

字元晦間自稱曰仲晦世為徽人居紫陽山下父
韋齋官遊建之政和遂居焉先生年十四韋齋歿
託孤於少傅劉子羽因居崇安縣屏山下從遊於
劉子翬紹興十八年登第授泉州同安簿考滿當

路尊敬不敢以屬吏待士思其教民懷其德不忍
其去至五考而後罷二十八年請獄祠二十九年
以陳康伯薦召力辭三十二年祠滿復請隆興初
召辭促行入對力詆和議除武博待次歸乾道初
促就職復請祠而歸三年劉公珙在樞府奏除密
院編修待次五年三促就職辭秋丁母祝氏憂六
年胡銓薦召以母制辭七年召辭九年省劄屢催
起發進呈請祠劄子旨特改合入官主祠淳熙元

年三辭改秩之命而後拜三年以龔茂良薦除祕書郎力辭主祠五年史浩議除中都官政府謂宜處以郡除南康軍六年辭至四始之任八年因臺諫言其在任奏事用劄子非舊制乞罷又以放人戶逃移自劾再請祠者五將滿除江西倉待次以荒政修舉除直祕閣改浙東倉九年以賑濟功進職二等直徽猷閣劾台守悟時相改除江西憲力辭有毀程氏之學陰詆先生者十年主祠十二年

祠滿復請四月拜雲臺之命十四年主管鴻慶宮
以楊萬里薦除江西憲十五年周相必大促奏事
之任辭不許六月入奏畢除兵郎疾甚未供職兵
侍林栗挾恨誣奏欺慢遂請祠除寶文閣主管崇
福宮上悟其去復召又辭十一月促入對再辭并
具封事以進讀終除主管太乙宮兼崇政殿說書
會執政有指道學為邪氣者力辭新命除祕閣修
撰仍外祠十六年進除祕撰從所請仍宮觀四月

三辭職名五月從所請仍舊直寶文閣除江東運
副力辭改漳州紹興二年喪長子請祠除祕撰主
鴻慶宮又除河南運副辭三年乞補滿宮觀除廣
西經畧辭四年復辭鴻慶宮時趙汝愚在樞府除
湖南帥辭不許五年至鎮寧宗在潛邸聞名即位
翌日首召除煥章待制侍講行且辭入奏上二劄
辭待制乞以修撰充說書方拜命因忤韓侂冑御
批與宮觀宰相臺諫給舍爭之除寶文閣待制與

郡力辭遂行十二月詔依舊煥章閣待制提舉鴻慶宮乞致仕不許慶元元年以疾丐休致冬詔仍祕撰二年御史沈繼祖奏褫職罷祠四年從所請致仕六年卒享年七十一嘉泰二年除華文待制郡不申沒以生存出命嘉定元年謚曰文三年贈寶文直學寶慶三年贈太師追封信國公紹定三年改徽國公淳祐元年上半年上幸學詔列從祀

幼有異稟五歲入小學始誦孝經即了其大義書八字

於其上曰若不如此便不成人間從羣兒嬉遊獨以
沙列八卦象詳觀側玩又嘗指日間於吏部曰日何
所附曰附於天又問天何所附吏部奇之

初冠字元晦屏山祝詞曰木晦於根春容晄敷人晦於
身神明內腴昔者曾子稱其友曰有若無實若虛不
斥厥名而傳於書雖百世之遠揣其氣象知顏如愚
自諸子言志回欲無伐一宣於言終身弗越陋巷閭
然其光烈烈從事於茲惟參也無慙貫道雖一省身

則三夾輔孔門翱翔兩轡學的欲正吾知斯之為指南惟先吏部丈儒之粹彪炳育珍又華其繼來茲講磨融融熹熹真聰廓開如源之方駛望洋渺瀰老我縮氣古人不云乎純亦不已予德不日新則時予之恥勿謂此耳充之益充借曰合矣宜養於蒙言而思竅動而思躋凜乎惴惴惟顏曾是畏後以元為四德之首不敢當遂更曰仲後書桃符曰佩韋遵考訓誨
木謹師傳

父疾草以家事囑劉子羽而訣于籍溪胡公憲白水劉
勉之屏山劉子翬且俾先生父事之既而稟學於三
君子屏山嘗告之曰吾於易得入德之門所謂不遠
復者乃吾三字符也勉之後以女女焉然不數年二
劉公相繼而歿獨事籍溪頗久

紹興十七年年十八中建寧鄉舉考官蔡茲謂人曰吾
取中一後生三策皆欲為朝廷措置大事他日必非
常人

二十三年時年二十四始學于李延平初韋齋雅敬延平故先生往師之嘗言自見李先生為學始就平實乃知向日從事釋老之說皆非

延平與其友羅博文宗禮書曰元晦進學甚力樂善畏義吾黨鮮有晚得此人商量所疑甚慰又云此人極穎悟力行可畏講學極造其微處論辨甚因此追求有所省渠所論難處皆是操戈入室須從原頭體認來所以好說話某昔於羅先生得入處後無朋友幾

放倒了得渠如此極有益渠初從謙開善處下工夫
來故皆就裏面體認今既論難見儒者路脈極能指
其差誤之處自見羅先生來未見有如此者又云此
子別無他事一味潛心於此初講學時頗為道理所
縛今漸能融釋於日用處一意下工夫若於此漸熟
則體用合矣此道理全在日用處熟若靜處有而動
處無即非矣

七月之同安蒞職勤敏纖悉必親廨有燕坐之室更名

曰高士軒而以令甲凡簿所當為者大書揭之楣間
職兼學事身率諸生厲以誠敬開以義理皆竦慕而
師尊之

三十二年六月孝宗即位秋應詔上封事首論聖學次
論金人於我有不共戴天之讐則不可和義理明矣
知義理之不可為而猶為之以有利而無害也臣策
之有百害無一利願斷以義理之公參以利害之實
閉關絕約任賢使能立綱紀厲風俗不敢懷自安之

念數年之外觀霧而圖之中原故地不為吾有乎夫
論監司者守令之紀綱朝廷者監司之本今之監司
病民皆臺諫宰執之親舊賓客顧陛下無自而知之
隆興初元將趨召命過延平問所宜言延平謂今日三
綱不正義利不分故中國之道衰而兵戈起人皆趨
利不顧義故主勢孤先生用其首說以對首論大學
之道次言今日非戰無以復讎非守無以制勝此皆
天理之自然非人欲之私念也三論古聖王制敵之

道其本不在乎威強而在乎德業其備不在乎邊境
而在乎朝廷其具不在乎兵食而在乎紀綱今日諫
爭尚壅倖倖方張爵賞易致威罰不行民力已殫國
用未節時王之望使敵未還湯思退力主和近臣曾
覲龍大淵招權故奏及之

先生與魏良齋帖云初讀第一奏論致知格物之道
天顏溫粹酬酢如響讀第二奏論復讐之義第三奏
論則不復聞聖語矣

乾道三年如湖南見南軒講論之語無所考見按南軒
贈行之詩曰君侯起南服豪氣蓋九州頃登文石陛
忠言動宸旒坐令聲利場縮頸仍包羞却來卧衡門
無愧白日休盡收湖海意仰希洙泗遊不遠關山阻
為我再月留遺經得紬繹心事兩綢繆超然會太極
眼底無全牛惟茲斷金友出處寧殊謀南山對床語
匪為林壑幽白雲政在望歸袂風颼颼朝來出別語
已抱離索憂妙質貴強矯精微更窮搜毫釐有弗察

體用豈周流驅車萬里道中途可停輟勉哉共無數
邈矣追前修先生答曰昔我抱冰炭從君識乾坤始
知太極緼要妙難名論謂有寧有迹謂無復何存惟
應酬酢處特達見本根萬化從此流千聖同茲源曠
然遠莫禦惕若初不煩云何學力微未勝物欲昏涓
涓始欲達已被黃流吞豈知一寸膠救此千丈渾勉
哉共無數此語期相敦以二詩觀之則其往復而深
相契者太極之旨也

四年編程氏遺書成初二程門人各有所錄雜出並行
間頗為後人竄易至是序次有倫去取精審學者始
有定從而程子之道復明於世

是歲建大饑盜發浦城崇安大震先生請于府貸粟散
給民免饑死社倉之法始此

六年居喪盡禮既葬日居墓側旦望則歸奠几筵蓋自
始死至祥禫參酌古今咸盡其變用成喪葬祭禮又
推之於冠昏共為一編命曰家禮然未嘗為學者道

之其後亦多損益未暇更定云

七年五夫三里社倉始成歲一歛散俾願貸者出息什二小歉則弛半息甚則盡蠲之

八年編次語孟精義成資治通鑑綱目成綱放春秋而兼採羣史之長目放左氏而稽合諸儒之粹西銘解義成

九年太極圖傳通書解成編次程氏外書成

淳熙二年東萊自東陽來留止寒泉精舍旬日相與掇

周程張書關大體而切日用者彙次成十四篇號近思錄先生嘗謂學者曰四子六經之階梯近思錄四子之階梯以言為學者當因此而入也壽饒東萊至鵝湖陸子壽子靜劉子澄來會相與講其所聞二陸執所見不合而罷

四年語孟集註或問成初先生既編次語孟集義又約其精粹妙得本旨者為集註傳疏其所以去取之義為或問然恐學者轉而趨薄故或問之書未嘗出以

示人然辨析毫厘無微不顯真讀書之龜鑑也又謂
易本為卜筮而作皆因吉凶以示訓戒故其言雖約
而所包甚廣夫子作傳亦略舉其一端以見凡例而
已然自諸儒分經合傳之後學者便大取義往往未
及玩心全經而遽執傳之一端以為定說於是一卦
一爻僅為一事而易之為用反有所局而無以通天
下之故故作周易本義又謂詩自毛鄭以來皆以小
序為主其與經文舛戾則妄穿鑿為說前後諸儒未

能釐正先生獨以經文為主而計其序之是非復為
一編附其經後以還其舊云

六年知南康軍首下教三條一以役煩稅重求所以寬

恤之方二俾士人鄉老教戒子弟使修孝弟忠信之

行三俾父老推擇子弟之志學者詣學又立濂溪祠

以二程配別立五賢堂

陶靖節劉西澗父
子李公擇陳了齋

復白鹿書

院約聖賢教人為學之大端條列以示學者

七年夏上封事言天下之務莫大於恤民恤民之本又

在正君心以立綱紀今民間特苦重稅正緣二稅之
入朝廷盡取以供軍而州縣無復贏餘則不免二稅
之外巧作名色以取民今民貧賦重若不計理軍實
去浮冗則民力決不可寬惟有選將核兵則可以節
軍資開廣屯田則可以實軍儲練習民兵則可以益
邊備至於天下紀綱不能以自立必君心正大而後
有所係而立君心不能以自正必親賢遠佞而後可
得而正今陛下親密者不過一二近習而此小人者

上則蠱惑陛下之心下則招集嗜利亡恥之士夫以
入其門中外靡然向之其所壞非獨壞陛下之紀綱
乃併與陛下所以立紀綱者而壞之

八年冬奏事延和殿極陳災異之由次言陛下即位之
初蓋嘗選建豪英任以政事不幸其間不能盡得其
人是以不復廣招賢哲而姑取軟熟易制之人以充
其位于是左右私褻使令之賤始得以奉燕閒備驅
使而宰相之權日輕又慮其勢有所偏而因重以壅

已也則時聽外廷之論將以陰察此輩之負犯而操切之陛下既未能循天理公聖心以正朝廷之大體則固已失其本矣又欲兼聽士大夫之公言以為駕馭之術則士大夫之進見有時而近習之從容無間士大夫之禮貌既莊而難親議論又苦而難入近習便僻側媚之態既足以蠱心志胥吏狡獪之術又足以眩聰明此其生熟甘苦既有所分恐陛下未及施其駕馭之術而先已墮其數中矣是以雖欲微抑此

輩而此輩之勢益重雖欲兼採公論而士大夫之勢日輕重者既挾其重以竊陛下之權輕者又借力於所重以為竊位固寵之計中外相應更濟其私日往月來浸淫晦蝕國家獨受其弊因條救荒之策七事以獻

十一年還自浙東見其士習馳騫於外每語學者且觀孟子道性善及求放心兩章務收斂凝定以致克己求仁之功而深斥其所學之誤以為舍六經語孟而

尊史遷舍窮理盡性而窮世變舍治心修身而喜事
功大為學者心術之害極力為呂祖儉輩言之又答
陳亮書箴其義利雙行王伯並用之說先生嘗曰海
內學術之弊不過兩說江西頓悟永康事功若不極
力爭辨此道無由得明

十三年易學啟蒙成先生初作易本義懼學者未明厥
旨乃作啟蒙四篇以為言易不本象數既支離散漫
而無所根著其本象數者又不知法象之自然未免

穿鑿傳會故其篇目以本圖書原卦畫明著策考變
占為次凡挂揲及變爻皆盡破古今諸儒之失

十四年先生既發揮大學以開悟學者又懼其失序無
本而不足以有進乃輯小學書以訓蒙士使培其根
以達其支云

十五年入奏言陛下即位二十有七年而因循荏苒無
尺寸之效可以仰酬聖志嘗反覆而思之無乃燕閒
蠲護之中虛明應物之地天理有未純人欲有未盡

天理未純是以為善不能充其量人欲未盡是以除患不能去其根一念之頃公私邪正是非得失之機朋分角立交戰於其中故體貌大臣非不厚而便僻側媚得以深被腹心之寄寤寐豪英非不切而柔邪庸繆得以久竊廊廟之權非不樂聞公議正論而有時不容非不聖讒說殄行而未免誤聽非不欲報復陵廟讎恥而不免畏怯苟安非不欲愛養生靈財力而未免嘆息愁恨凡若此類不一而足願陛下自今

以往一念之頃則必謹而察之此為天理邪為人欲
邪果天理也則敬以克之而不使其少有壅闕果人
欲也則敬以克之而不使其少有凝滯推而至於言
語動作之間用人處事之際無不以是裁之則聖心
洞然中外融徹無一毫之私欲得以介乎其間而天
下之事將為陛下之所欲為無不如志矣上迎謂曰
久不見卿卿亦老矣今當處卿以清要之任不復勞
卿州縣獎諭甚渥是行也有要之於路以正心誠意

為上所厭聞戒以勿言者先生曰吾平生所得惟此四字豈可回互而欺君乎

十一月趣入對遂上封事略曰今天下大勢如人有重病內自心腹外達四支無一毛一髮不受病者臣敢以天下之大本與今日之急務為陛下言之蓋大本者陛下之心急務則輔翼太子選任大臣振舉綱維變化風俗愛養民力修明軍政六者是也古者聖王兢兢業業持守此心雖在紛華波動之中幽獨得肆

之地而所以精之一之克之復之如對神明如臨淵
谷猶恐隱微之間或有差失而不自知是以建師保
之官列諫爭之職凡飲食酒漿衣服次舍器用財賄
與夫宦官宮妾之政無一不領於冢宰使左右前後
一動一靜無不制以有司之法而無纖芥之隙瞬息
之頃得以隱其毫髮之私陛下之所以精一克復而
持守其心果有如此之功乎所以修身齊家而正其
左右果有如此之效乎宮省事禁臣固不得而知然

爵賞之濫貨賂之流閭巷竊言久已不勝其籍籍則
陛下所以修之家者恐其未有以及古之聖王也至
於左右便嬖之私恩遇過當此輩但當使之守門傳
命供掃除之役不當假借崇長使得逞邪媚作淫巧
於內以蕩上心立門庭招權勢於外以累聖政臣切
聞之道路自王莽既逐之後諸將差除多出此人之
手陛下竭生靈之膏血以奉軍旅而軍士未嘗得溫
飽是皆將帥巧為名色奪取其糧肆行貨賂於近習

以圖進用出入禁闥腹心之臣外交將帥共為欺蔽
以至於此而陛下不悟反寵暱之以是為我之私人
至使宰相不得議其制置之得失給諫不得論其除
授之是非則陛下所以正其左右未能及古之聖王
又明矣至於輔翼太子則自王十朋陳良翰之後宮
僚之選號為得人而能稱其職者蓋已鮮矣而又時
使邪佞猥薄闕冗庸妄之輩或得參錯於其間所謂
講讀亦姑以應文備數而未聞其有箴規之效至於

從容朝夕陪侍遊宴者皆不過使臣宦者數輩而已
夫立太子而不置師傅賓客則無以發其隆師親友
尊德樂義之心獨使春坊使臣得侍左右則無以防
其戲嫚嫖狎奇衰雜進之害宜討論前典置師傅賓
客之官罷去春坊使臣而使詹事庶子各復其職至
於選任大臣則以陛下之聰明豈不知天下之事必
得剛明公正之人而後可任哉其所以常不得如此
之人而反容鄙夫之竊位者直以一念之間未能徹

其私邪之閉而燕私之好便嬖之流不能盡由於法
度若用剛明公正之人以為輔相則恐其有以妨吾
之事害吾之人而不得肆是以選掄之際常先排擯
此輩寘之度外而後取凡疲懦軟熟平日不敢直言
正色之人而揣摩之又於其中得其至庸極陋決可
保其不至於有所妨者然後舉而加之於位是以除
書未出而物色先定姓名未顯而天下已逆知其非
天下之第一流矣至於振肅紀綱變化風俗則今日

宮省之間禁密之地而天下不公之道不正之人顧
乃得以窟穴盤據於其間及其作姦犯法則陛下未
能深割私意而付諸外庭之議論正以有司之法是
以綱紀不能無所撓敗紀綱不正於上是以風俗頗
弊於下蓋其為患之日久矣而浙中為尤甚大率習
為軟美之態依阿之容以不分是非不辨曲直為得
計下之事上固不敢少拂其意上之御下亦不敢稍
拂其情惟其私意之所在則千塗萬轍經營計較必

欲得而後已甚者以金珠為脯醢以契券為詩文宰相可啗則啗宰相近習可通則通近習惟得之求無復廉恥一有剛毅正直守道循理之士出乎其間則羣議衆排指為道學而加以矯激之罪十數年來以此二字禁錮天下之賢人君子復如崇宣之間所謂元祐學術者排擯詆辱必使無所容其身而後已嗚呼此豈治世之事而尚復忍言之哉至於愛養民力修明軍政則自虞允文之為相也盡取版曹歲入窠

名之必可指擬者號為歲終羨餘之數而輸之內帑
顧以其有名無實積累掛欠空載簿籍不可催理者
撥還版曹以為內帑之積將以備他日用兵進取不
時之須然自是以來二十餘年內帑歲入不知幾何
而認為私貯典以私人宰相不得以式貢均節其出
入版曹不得以簿書勾考其存亡其日銷月耗以奉
燕私之費者蓋不知幾何矣而曷嘗聞其能用此錢
以易敵人之首如太祖皇帝之言哉徒使版曹經費

闕乏日甚督促日峻以至廢去祖宗以來破分良法而必以十分登足為限以為未足則又造為監司比較郡守殿最之法以誘脅之於是中外承風競為苛急此民力之所以重困也諸將之求進也必先掊剋士卒以殖私財然後以此自結於陛下之私人而斬以姓名達於陛下之貴將貴將得其姓名即以付諸軍中使自什伍以上節次保明稱其才武堪任將帥然後具奏為牘而言之陛下之前陛下但見其等級

推先案牘具備則誠以為公薦而可以為得人矣而豈知其估價輸錢已若晚唐之債帥哉如此而望其修明軍政激勸士卒以強國勢豈不誤邪凡此六事皆不可緩而本在於陛下之一心一心正則六事無不正一有人心私欲介乎其間則雖欲憊精勞力以求正乎六事亦將徒為文具而天下之事愈至於不可為矣疏入夜漏下七刻上已就寢亟起秉燭讀之終篇明日除主管太乙宮兼崇政殿說書先生所望

於君者愈深而其言愈切戊申封事之末有曰日月
愈邁如川之流一往而不復不惟臣之蒼顏白髮已
迫遲莫而切仰天顏已覺非昔時矣忠忱懇惻至今
讀者為之流涕然所言皆痛詆大臣近習上眷愈厚
而嫉者愈深是以不能一日安其身於朝廷之上
始出太極通書西銘二書解義以授學者

紹熙元年在漳州刊四經四子書成奉以告諸先聖易
取古文分經傳為十二篇詩書皆取序合為一篇寘

諸經後春秋則出左氏經文別為一書以踵三經後
四子則謂程子之教人必先使之用力乎大學論語
中庸孟子之書然後及乎六經蓋其難易小大遠近
之序固如此而不可亂也然讀者不先於孟子而遽
及中庸則非所以為入道之漸

五年寧宗舊聞先生名恨不得為講官即位翌日召為
侍講八月發長沙十月入奏首論經權常變之道次
言為學之道莫先於窮理窮理之要必在於讀書讀

書之法莫貴於循序而致精致精之本則又在於居敬而持志既對辭待制侍講上手札卿經術淵源正資勸講次對之職勿復牢辭以副朕崇儒重道之意先生惶恐拜命

每講務積誠意以感悟上心勸上以求放心為本以平日所論著者敷陳開析坦然明白講畢有可以開益上德者罄竭無隱上亦虛心嘉納焉

上之立也趙忠定求能通意於長信宮者未有其人或

言韓侂胄於太皇為親屬遣入白不許侂胄出遇內侍關禮于門告之故禮請獨入泣涕固請太皇許之命復呼侂胄入使喻意廟堂其論遂定侂胄自謂有定策功依託肺腑居中用事先生自離長沙已聞之惕然以為憂因疏牘微寓其意及進對再三面言之又約吏侍彭龜年同請對白發其奸彭出護使客韓益得志時忠定方收聚知名之士海內引領以觀新政而事已多從中出先生屢言於上又數書遣生徒

密白忠定當以厚賞酬其勞勿使預政忠定謂其易
制不復遠慮先生因講畢奏疏極言之韓大怒陰與
其黨謀先去其首者則其餘去之易耳乃於禁中為
優戲以熒惑上聽及先生晚講留身申言前疏乞施
行纔退即降御批與宮觀丞相執奏不行內侍徑遣
付下而臺諫給舍皆爭留不可先生遂去國歸過玉
山為其令講四端之旨

是冬竹林精舍成

後改
滄洲

率諸生行釋菜之禮于先聖先

師以告成事周程邵張司馬延平七先生從祀祝文
曰恭惟道統遠自羲軒集厥大成允屬元聖述古垂
訓萬世作程三千其徒化若時雨惟顏曾氏傳得其
宗逮思及輿益以光大自時厥後口耳失真千有餘
年乃曰有繼周程授受萬理一原曰邵曰張爰及司
馬學雖殊轍道則同歸俾我後人如夜復旦不以凡
陋少蒙義方中靡常師晚逢有道載鑽載仰雖未有
聞賴天之靈幸無失墜逮茲退老同好鼎來落此一

丘羣居伊始探原推本敢昧厥初冀以告虔尚其昭
格陟降庭止惠我光明傳之方來永永無斁

慶元元年侂冑誣趙相以不軌竄置永州中外震駭具
創為偽學之名以斥善類先生草封事數萬言極陳
奸邪蔽主之禍因以明丞相之寃諸生力諫遂策之
遇遯之同人先生默然焚其稿更號遯翁朝廷治黨
人方急趙謫死于道

二年冬先生方與諸生講論有報褫職罷祠者先生略

起視之復坐講論如初辭色更為和平翌日諸生始知有指揮

六年三月先生素有足疾比年加以痞隔之證醫者頗用駛藥乙未夜為諸生說太極圖庚申夜復說西銘且言為學之要惟事事審求其是決去其非積習久之心與理一自然所發皆無私曲聖人應萬事天地生萬物直而已矣辛酉改大學誠意章午刻疾甚不能興癸亥諸生入問疾先生勉以相倡率下堅苦工

夫牢固著足方有進步處甲子命移寢中堂諸生復入問疾因請曰先生疾革矣萬一不諱當用書儀乎先生搖首然則當用儀禮乎亦搖首然則以儀禮書儀參用之乃頷之意若索紙筆然握筆已不能運少頃置筆就枕誤觸巾目門人使正之揮婦女毋得近諸生揖而退良久恬然而逝是日大風拔木洪流崩崖哲人之萎豈小變哉

門人范念德率同門之士祭於墓隅曰天之生賢蓋亦

不數儲精孕靈及河維嶽厥惟孔艱是以殊邈先生
之生黃河其清先生之亡維嶽其頽不知何年復此
胚胎徒友紛集窀穸告期山哀浦思雲慘風悲臨穴
一慟萬古長辭

先生自筮仕以至屬纊五十年間歷事四朝仕於外者
僅九考立于朝者纔四十日而已

初居崇安五夫榜讀書之室曰紫陽書堂識鄉關常在
目也後築室建陽蘆峰之巔號曰雲谷其草堂曰晦

菴自號雲谷老人亦曰晦菴因自號晦翁晚居考亭作精舍曰滄洲號滄洲病叟最後號遜翁

公持心甚嚴不萌一毫非正之念其於書捨六籍則諸子曲說不得干其私其於道不敢深索也恐入乎幽不敢泛求也恐汨其統讀書初貫穿百家終也韜以聖人之格言自近而入微由博而歸約原心於眇忽析理於錙銖采衆說之精而遺其粗集諸儒之粹而去其駁曰醇矣哉云云山林之日長講學之功深也

平居與其徒磨切講貫皆道德性命之言忠敬孝愛之事由公之學者必行已莊與人信居則安貧而樂道仕則尊君而愛民重名節而審出處合於古而背於時好若此者真公之學也

劉彌正
議謚

嘗云作詩須從陶柳門庭中來乃佳不如是無以發蕭散冲淡之極不免於局促塵埃無由到古人佳處也如選詩及韋蘓州詩亦不可不熟觀然更須讀語孟以探其本又云三百篇性情之本離騷詞賦之宗學

詩而不本之於此是亦淺矣後山詩固佳然前輩以
為盡力規模已少變化然學者要務在反求諸已精
熟語孟求所以見聖賢用意處

問嘗讀孟子求放心章今覺心中有三病云云曰若論
求此心放失有千般萬樣病何止於三然亦別無道
理醫治只在專一果能專一則靜靜則明明則自無
遮蔽既無遮蔽須自有舒泰寬展處這也未嘗如此
且收歛此心專一漸漸自會熟熟了自有此意看來

百事只在熟且如百工伎藝也只要熟熟則精精則巧

又問先生往時初學亦覺心有不專一否曰么初為學初無見成規模這邊也去理會尋討那邊也去理會尋討向時諸前輩每每各是一般說話後來見李先生說得下落說得較縝密若看如今自是有見成下工夫處看來須是先理會个安著處譬如人治生也須先理會个屋子安著身已方始如何積累漸漸

須做成家計若先來未有安著身已處雖經營畢竟
不濟事為學者不先存此心雖說要去理會東東西
西都自無安著處孟子所以云收放心亦不是說只
收放心便了收放心且收斂得个根基方可以做工
夫若但知收放心不做工夫則如近日江西所說則
是守个死物事又曰某不敢自昧實以銖累寸積而
得之又曰以前看得心只是虛蕩地而今看得來湛
然空明時那萬理便在裏面向前看得似一張白紙

今看得那紙上都是字又曰某舊時持論亦好高近
來漸漸移近下漸漸覺實

今日學者不長進只是心不在焉嘗記少年時在同安
夜聞鐘鼓聲聽其一聲未絕而此心已自走作因此
警省乃知為學須是專心致志又言人有一正念自
是分曉又從旁別生一小念漸漸放闊去不可不察
嘗論科舉云非是科舉累人自是人累科舉若高見遠
識之士讀聖賢書據吾所見而為文以應之得失利

害置之度外雖日日應舉亦不累也某於科舉自小
便見得輕初亦非有所見而輕之也

曰初師屏山籍溪學於丈定又好佛老以丈定之學為
論治道則可而道未至然於佛老亦未有見屏山少
年能為舉業官莆田接塔下一僧能入定數日後乃
見了老歸家讀誦儒書以為與佛合故作聖傳論其
後屏山先亡籍溪在公自見於此道未有所得乃見
延平云云某年十五六時亦嘗留心於此一日在劉

病翁所會一僧與之語其僧只相應和了說也不說
是不是却與劉說某也理會得个昭昭靈靈底禪劉
後說與某某遂疑此心更有要妙處在遂去扣問也
見他說得也煞好又去赴試時使用他意思去胡說
是時文字不似而今細密由人粗說試官為某說動
了遂得舉後赴同安任時年二十四至矣始見李先
生與他說李只說不是却疑李先生理會此未得再
三質問先生為人簡重却不甚會說只教看聖賢言

語某遂將那禪來權倚閣起意中道禪亦自在且將
聖人書來讀讀來讀去一日復一日覺得聖賢言語
漸漸有味却回頭看釋氏之說漸漸破綻罅漏百出
某少時未有知亦曾學禪只李先生極言其不是後來
考鏡却是這邊味長才這邊長得一寸那邊縮了一
寸到今銷鑠無餘矣

初見延平說得無限道理也曾去學禪李先生云公恁
地懸空理會得許多道理而面前事却理會不下道

亦無他玄妙只在日用間著實做工夫處便自見得
某後來方曉得他說故今日不至於無理會耳

舊嘗以論心論性處皆類聚看看熟久則自見

讀書須純一如看一般未了又要般涉都不濟事某向
時讀書方其讀上句則不知有下句方其讀上章則
不知有下章讀中庸則祇讀中庸讀論語則祇讀論
語一日之間祇看一二章將諸家說看合與不合凡
讀書到冷淡無味處尤當著力推考

舊見先生說理會文字須令一件融釋了後方更理會
一件融釋二字下得極好此亦伊川所謂今日格一
件明日格一件格得多後自脫然有貫通處此亦是
它真曾經歷來便說得如此分明今若一件未能融
釋而又欲理會一件則第二件又不了推之萬事萬
事不了何益

凡看文字諸家說異同處最可觀某舊日看文字專看
異同處如謝上蔡之說如彼楊龜山之說如此何者

為得何者為失所以為得者是如何所以為失者是如何

把一己私意去看聖賢之書如何看得出某所以讀書
自覺得力者只是不先立論且尋句內意隨文解義
少時讀四書甚辛苦諸公今讀時却又較易做工夫
了

某向來看大學猶病於未仔細如今愈看方見得精切
因說前輩諸先生長者說話於大體處固無可議若

看其他細碎處大有工夫未到

某於大學用工甚多溫公作通鑑言臣平生精力盡在此書某於大學亦然論孟中庸却不費力

舊時看文字甚費心力如論孟諸家解有一箱每看一段必各就諸說上推尋意脈各見得著落然後斷其是非是底都抄出一兩字是亦抄出雖未如今集註簡靜然大綱已定今集註只就那上刪來但人不著心守見成就只草草看了今試將精義來參看兩

段所以去取底只如何便自見得

易非學者急務某平生也費了些精神理會易與詩然其得力則未若語孟之多

讀詩惟是諷誦之功上蔡亦云詩須是謳吟諷誦以得之某舊時讀詩也只先去看許多注解少間却被惑亂後來讀至半了却只將詩來諷誦至四五十過已漸漸得詩之意却去看註解便覺減了五分以上工夫更從頭諷誦四五十過則胸中判然矣如今讀書

多是不曾理會一處通透了少間却多牽引前面疑難來此最學者大病

某二十年前得上蔡語錄觀之初用銀朱畫出合處及再觀則不同矣乃用粉筆三觀則又用墨筆數過之後則全與元看時不同矣

讀書用工之難諸公覺得大故淺近不曾著心某舊時用心甚苦思量這道理如過危木橋子相去只在毫髮之間才失脚便跌落下去用心極苦五十歲已後

覺得心力短看見道理只爭絲髮之間只是心力巴
不上所以大學中庸語孟諸文字皆是五十歲以前
做了五十歲以後長進得某不多

大抵讀書須是虛心方得他聖人說一字是一字自家
只平著心去秤停他都不使得一毫杜撰只順他去
某向時也杜撰說得終不濟事如今方見得分明方
見得聖人一言一字不吾欺只今六十一歲方理會
得恁地若或去年死也則枉了自今夏來覺見得才

是聖人說話也不少一个字也不多一个字恰恰地
好都不用些穿鑿莊子云吾與之虛而委蛇既虛了
又要隨他曲折恁地去又曰某覺今年方無疑

某當初講學豈意到這裏幸而天假之年許多道理在
這裏今年頗覺勝似去年去年勝似前年

讀書貪多最是大病下稍都理會不得若到閑時無書
讀時得一件書看更子細某向為同安簿滿到泉州
侯批書在客邸借大字只借得一冊孟子將來子細

讀方尋得本意見看他初問如此問又如此答待再問又恁地答其文雖若不同自有意脈都相貫通句句語意都有下落

看道理若只恁地說過一遍便了則都不濟事須是常常把來思量始得延平嘗言道理須是日中理會夜裏却去靜處坐地思量方始有得某依此說去做工夫真个是不同

先生學靡常師出入於經傳泛濫於釋老亦既有年及

見延平洞明道要頓悟異學之非盡能拊擊其失由
是專精致誠剖微窮深晝夜不懈至忘寢食而道統
之傳始有所歸矣

先生自少厲志聖賢之學自韋齋得中原文獻之傳聞
河洛之學推明聖賢遺意日誦大學中庸以用力於
致知誠意之地先生蚤歲已知其說而心好之韋齋
病且亟屬曰籍溪胡原仲白水劉致中屏山劉彥冲
三人吾友也學有淵源吾所敬畏吾即死汝往事之

而惟其言之聽則吾死不恨矣先生既孤則奉以告
三君子而稟學焉時年十有四慨然有求道之志博
求之經傳徧交當世有識之士雖釋老之學亦必究
其歸趣訂其是非延平於韋齋為同門友先生歸自
同安不遠數百里徒步往從之延平稱之曰樂善好
義鮮與倫比又曰穎悟絕人力行可畏其所論難體
認切至自是從遊累年精思實體而學之所造者益
深矣

其為學也窮理以致其知反躬以踐其實居敬者所以
成始成終也謂致知不以敬則昏惑紛擾無以察義
理之歸躬行不以敬則怠惰放肆無以致義理之實
持敬之方莫先主一既為之箴以自儆又筆之書以
為小學大學皆本於此終日儼然端坐一室討論典
則未嘗少輟自吾一心一身以至萬事萬物莫不有
理存此心於齊莊靜一之中窮此理於學問思辨之
際皆有以見其所當然而不容已與其所以然而不

可易然充其知而見於行者未嘗不反之於身也不
睹不聞之前所以戒懼者愈嚴愈敬隱微幽獨之際
所以省察者愈精愈密思慮未萌而知覺不昧事物
既接而品節不差無所容乎人欲之私而有以全乎
天理之正不安於偏見不急於小成而道之正統在
是矣

其為道也有太極而陰陽分有陰陽而五行具稟陰陽
之氣以生則太極之理各具於其中天所賦為命人

所受為性感於物為情統性情為心根於性則為仁
義禮智之德發於情則為惻隱羞惡辭遜是非之端
形於身則為手足耳目口鼻之用見於事則為君臣
父子夫婦兄弟朋友之常求諸人則人之理不異於
已參諸物則物之理不異於人貫徹古今充塞宇宙
無一息之間斷無一毫之空闕莫不析之極其精而
不亂然後合之盡其大而無餘先生之於道可謂建
諸天地而不悖質諸聖賢而無疑矣

故其得於已而為德也。以一心而窮造化之原，盡性情之妙，達聖賢之蘊，以一身而體天地之運，備事物之理，任綱常之責，明足以察其微，剛足以任其重，弘足以致其廣，毅足以極其常，其存之也虛而靜，其發之也果而確，其用之也應事接物而不窮，其守之也歷變履險而不易，本末精粗不見其或遺，表裏初終不見其或異，至其養深積厚，矜持者純熟嚴厲者和平，心不待操而存，義不待索而精，猶以為義理無窮，歲

月有限常慊然有不足之意蓋有日新又新不能自
已者而非後學之所可擬議也

其可見之行則修諸身者其色莊其言厲其行舒而恭
其坐端而直其閒居也未明而起深衣幅巾方履拜
於家廟以及先聖退坐書室几案必正書籍器用必
整

其飲食也羹食行列有定位匕箸舉措有定所倦而休
也瞑目端坐休而起也整步徐行中夜而寢既寢而

寤則擁衾而坐或至達旦威儀容止之則自少至老
祁寒盛暑造次顛沛未嘗有須臾之離也行於家者
奉親極其孝撫下極其慈閨庭之間內外斬斬恩義
之篤怡怡如也

其祭祀也事無鉅細必誠必敬小不如儀則終日不樂
已祭無違禮則油然而喜死喪之際哀戚備至飲食
衰經各稱其情賓客往來無不延遇稱家有無常盡
其歡於親故雖疎遠必致其愛於鄉閭雖微賤必致

其恭吉凶慶弔禮無所遺賙卹問遺恩無所闕其自
奉則衣取蔽體食取充腹居止取足以障風雨人不
能堪而處之裕如也

其措諸事業則州縣之施設立朝之言論經綸規畫正
大宏偉亦可槩見雖達而行道不能施之一時然退
而明道足以傳之萬代謂聖賢道統之傳散在方冊
聖經之旨不明則道統之傳始晦於是竭其精力以
研窮聖賢之經訓於大學中庸則補其闕遺別其次

第綱領條目粲然復明於語孟則深原當時答問之意使讀而味之者如親見聖賢而面命之於易與詩則求其本義攻其末失深得古人遺意於數千載之上凡數經者見諸傳註其關於天命之微人心之奧入德之門造道之闕者既已極深研幾探賾索隱發其旨趣而無所遺矣至於一字未安一詞未備亦必沈潛反覆或達旦不寐或累日不倦必求至當而後已故章旨字義至微至細莫不理明詞順易知易行

於書則疑今文之艱澁反不若古文之平易於春秋則疑聖心之正大決不類傳註之穿鑿於禮則病王安石廢罷儀禮而傳記獨存於樂則憫後世律尺既亡而清濁無據是數經者亦嘗討論本末雖未能著為成書然其大旨固已獨得之矣若歷代史記則又考論西周以來至於五代取司馬公編年之書緝以春秋紀事之法綱舉而不繁目張而不紊國家之理亂君臣之得失如指諸掌

周程張邵之書所以繼孔孟道統之傳歷時未久微言
大義鬱而不章為之裒集發明而後得以盛行于世
太極先天圖精微廣博不可涯涘為之解剥條畫而
後天地本原聖賢蘊奧不至於泯沒程張門人祖述
其學所得有淺深所見有疏密先生既為之區別以
悉取其所長至或識見小偏流於異端者亦必研窮
剖析而不沒其所短南軒張公東萊呂公同出其時
先生以其志同道合樂與之友至或識見少異亦必

講磨辨難以一其歸至若求道而過者病傳註誦習
之煩以為不立文字可以識心見性不假修為可以
造道入德守虛靈之識而昧天理之真借儒者之言
以文佛老之說學者利其簡便詆訾聖賢捐棄經典
猖狂叫呶側僻固陋自以為悟立論愈下者則又崇
獎漢唐比附三代以便其計功謀利之私二說並立
高者陷於空無下者溺於卑陋其害豈淺淺哉先生
力排之俾不至亂吾道以惑天下於是學者靡然向

之

其於讀書也又必使之辨其音釋正其章句玩其辭求其義研精覃思以究其所難平心易氣以聽其所自得然為已務實辨別義利毋自欺謹其獨之戒未嘗不三致意焉蓋亦欲學者窮理反身而持之以敬也從游之士迭誦所習以質其疑意有未諭則委曲告之而未嘗倦問有未切則反覆戒之而未嘗隱務學篤則喜見於言進道難則憂形于色講論經典商略

古今率至夜半雖疾病支離至諸生問辨則脫然沉
痾之去體一日不講學則惕然常以為憂振衣而來
遠自川蜀大詞之傳流及海外至於夷虜亦知慕其
道竊問其起居窮鄉晚出家蓄其書私淑諸人者不
可勝數

先生既沒學者傳其書信其道者益衆亦足以見理義
之感於人者深矣繼往聖將微之緒啟前賢未發之
機辨諸儒之得失闢異論之訛謬明天理正人心事

卷十二
業之大又孰有加於此者

天文地志律厯兵機亦皆洞究淵微大詞字畫騷人才
士疲精竭神常病其難至先生未嘗用意而亦皆動
中規繩可為世法是非姿稟之異學行之篤安能事
事物物各當其理而造其極哉學修而道立德成而
行尊見之事業者又如此秦漢以來迂儒曲學既皆
不足以望其藩牆而近代諸儒有志乎孔孟周程之
學者亦豈能以造其閭域哉嗚呼是殆天所以相斯

丈馬篤生哲人以大斯道之傳也

並黃勉齋述行狀

道之正統待人而後傳自周以來任傳道之責得統之正者不過數人而能使斯道章章較著者一二人而止耳由孔子而後曾子子思繼其微至孟子而始著由孟子而後周程張子繼其絕至先生而始著蓋千有餘年之間孔孟之徒所以推明是道者既已煨燼殘闕離析穿鑿蠹壞之後扶持植立厥功偉然未及百年踳駁尤甚先生出而自周以來聖賢相傳之道

一旦豁然如大明中天昭晰呈露則撫其言行又可

略歟

全上

先生之道之至原其所以臻斯闕者無他焉亦曰主敬以立其本窮理以致其知反躬以踐其實而敬者又貫通乎三者之間所以成終而成始也故其主敬也一其內以制乎外齋其外以養乎內內則無貳無適寂然不動以為酬酢萬變之主外則儼然肅然終日若對神明而有以保固其中心之所存及其久也靜

虛動直中一外融而人不見其持守之力則篤敬之
驗也其窮理也虛其心平其氣字求其訓句索其旨
未得乎前則不敢求乎後未通乎此則不敢忘乎彼
使之意定理明而無躁易凌躡之患心專慮一而無
貪多欲速之蔽始以熟讀使其言皆若出於吾之口
繼以精思使其意皆若出於吾之心自表而究裏自
流而遡源索其精微若別黑白辨其節目若數一二
而又反復以涵泳之切已以體察之必若先儒所謂

沛然若河海之浸膏澤之潤渙然冰釋怡然理順而後為有得焉若乃立論以駭率聖言鑿說以妄求新意或援引以相糾紛或假借以相混惑龐心浮氣意象匆匆常若有所迫逐而未嘗徘徊顧戀如不忍去以待其浹洽貫通之功深以為學者之大病不痛絕乎此則終無入德之期蓋自孔孟以降千五百年之間讀書者衆矣未有窮理若此其精者也

先生天姿英邁視世之所屑者不啻如草芥脩然獨與

道俱卓然獨與道立固已迥出庶物之表及夫理明
義精養深積盛充而為德行發而為事業人之視之
但見其渾灝磅礴不可涯涘而莫知為之者

入以事君則必思堯舜其君出以治民則必欲堯舜其
民言論風旨之所傳政教條令之所布固皆可為世
法而其考諸先聖而不繆建諸天地而不悖閱百世
以俟聖人而不惑者則以訂正羣書立為準則使學
者有所據依循守以入於堯舜之道此其勲烈之尤

彰明盛大者

語孟二書世所誦習為之說者亦多而析理未精釋言未備大學中庸自程子始表章之然大學次序不倫闕遺未補中庸雖為完篇而章句渾淪讀者亦莫知其條理之粲然也先生蒐輯先儒之說而斷以己意彙別區分文從字順妙得聖人之本旨昭示斯道之標的又使學者先讀大學以立其規模次及語孟以盡其蘊奧而後會其歸於中庸尺度權衡之既定由

是以窮諸經訂羣史以及百氏之書則將無理之不可精無事之不可處矣

又嘗集小學書使學者得以先正其操履集近思錄使學者得以先識其門庭羽翼四子以相左右蓋此六書者學者之飲食裘葛準繩矩不可以須臾離也聖人復起不易斯言矣其於易也推卦畫之本體辨三聖之旨歸專主筮占而實該萬變以還潔淨精微之舊其於詩也深玩詞氣而得詩人之本意盡削小

序以破後儒之臆說妄言美刺悉就芟夷以復溫柔
篤厚之教其於禮也則以儀禮為經而取禮記及諸
經史書所載有及於禮者皆以附於本經之下具列
註疏諸儒之說補其闕遺而析其疑晦雖不克就而
宏綱大要固已舉矣謂書之出於口授者多艱澁得
於壁藏者反平易學者當沉潛反復於其易而不必
穿鑿附會於其難謂春秋正義明道尊王賤霸尊君
抑臣內夏外夷乃其大義而以爵氏名字日月土地

為褒貶之例若法家之深刻乃傳者之鑿說謂周官
徧布周密周公運用天理熟爛之書學者既通四子
又讀一經而遂學焉則所以治國平天下者思過半
矣

謂通鑑編年之體近古因就繩以尺牘之法以綱提其
要以目紀其詳綱倣春秋而兼採羣史之長目倣左
氏而稽合諸儒之粹褒貶大義凜乎烈日秋霜而繁
簡相發又足為史家之矩範謂諸子百家其言多詭

於聖人獨韓子論性專指五常最為得之因為之考訂其集之同異以傳於世而屈原忠憤千古莫白亦頗為發明其旨樂律久亡清濁無據亦嘗討論本末探測幽眇雖未及著為成書而其大旨固已獨得之矣

若夫析世學之謬辨異教之非擣其巢穴而砭其隱微使學者由於大中至正之則而不躋於荆棘樛穽之塗摧陷肅清之功固非近世諸儒所能髣髴其萬一

也

自夫子設教洙泗以博文約禮授學者顏曾子思孟子
相與守之未嘗失墜其後正學失傳士各以意為學
其驚於該洽者既以聞見積累自矜而流於汎濫駁
雜之歸其溺於徑約也又謂不立文字可以識心見
性而陷於曠蕩空虛之域學者則知所傳矣亦或悅
於持敬之約而憚於觀理之煩先生身任道統而廣
覽載籍先秦古書既加考索歷代史記國朝典章以

及古今儒生學士之作靡不徧觀取其所同而削其不合稽其實用而剪其煩蕪參伍辨證以扶經訓而詰其舛差秋毫不得適焉數千年間世道學術議論文詞之變皆若身親歷於其間而耳接目覩焉者大本大根固已上達直遂柯葉散殊亦皆隨其所至究其所窮條分派別經緯萬端本末鉅細包羅囊括無所遺漏故所釋諸書悉有依據不為臆度料想之說外至文章字畫亦皆高絕一世蓋其包涵停蓄溥博

淵泉故其出之者自若是其無窮也學者據經辨疑
隨問隨析固皆極其精要暇而辨論古今其應如響
愈扣愈深疊疊不絕及詳味而細察之則方融貫於
一理而已矣

嘗言曰學者望道未見固必即書以窮理苟有見處亦
當攷諸書有所證驗而後實有所裨助而後安不然
則德孤而與枯槁寂滅者無以異矣潛心大業何有
哉矧自周衰教失禮樂養德之具一切盡廢所以維

持此心者惟有書耳謂可輾轉經傳遽指為糟粕而不觀乎要在以心體之以身踐之而勿以空言視之而已矣以是存心以是克己仁豈遠乎哉至於晚歲德尊言立猶以義理無窮歲月有限慊然有不足之意洙泗以還博大約禮兩極其至者先生一人而已先生教人廣大而科級甚嚴循循有序不容躐等凌節而進至於切已務實辨別義利毋自欺謹其獨之戒未嘗不丁寧懇到提耳而極言之每誦南軒張公

無所為而然之語必三歎焉晚見諸生繳繞於文義之間深慮斯道之無傳始頗指示本體使深思而自得之其望於學者益切矣

嗚呼道之在天下未嘗亡也而統之相傳苟非其人則不得而興自孟子沒千有餘年而後周程張子出焉歷時未久浸失其真及先生出而後合濂溪之正傳紹魯鄒之墜緒前聖後賢之道該徧全備其亦可謂盛矣蓋昔者易更三古而混於八索詩書煩亂禮樂

散亡而莫克正也夫子從而贊之定之刪之正之又作春秋六經始備以為萬世道德之宗主秦火之餘六經既已爛脫諸儒各以已見妄穿鑿為說未嘗有知道者也周程張子其道明矣然於經言未暇釐正一時從遊之士或昧其旨遁而入於異端者有矣先生於是考訂訛繆探索深微總裁大典勒成一家之言仰包粹古之載籍下採近世之文獻集其大成以定萬世之法然後斯道大明如日中天有目者皆可

觀也夫子之經得先生而正夫子之道得先生而明
起斯文於將墜覺來裔於無窮雖與天壤俱弊可也

並李方子
撰行實



宋名臣言行錄外集卷十二